

近代名詩選



中華民國二十五年一月一版

近代名人詩選

編輯者 江陰 吳芹

校閱者 沈世榮

出版者 大達圖書供應社

發行人 周健人

發行所 大達圖書供應社

上海河南路
一三七號

分發行所全國各大書坊

洋裝一冊定價一元

序言

一代之興。卽有一代之文獻。一代之文獻。與其朝之政教風俗。恆有密切之關係焉。詩盛於唐。自宋及元明。頽而不振。有清一朝名手輩出。雖未及於唐。而已超於宋元明。民國之興。今纔三載。當民國建設之初。正古學復興之日。而自茲以往。乃中西匯合之期。此後中華文獻。日見昌明。炳炳烺烺。必有爲亙古所未有者。固不特駕唐宋已也。而今日者。則特其萌芽耳。然當世作者。或爲手創民國之英傑。或爲前清名人。其文字皆有可觀也。爲輯此編。示民國詩學之端肇。或亦識者所深許乎。至其體例。則無論達官平民。一概入錄。其爲前清名士。但入民國者。一并錄焉。見聞有限。補漏拾遺。請俟他日。中華民國三年江陰吳芹自識

近代名人詩選目次

王闓運	一
嚴復	二三
康有爲	二四
梁啓超	二四
張謇	二六
吳保初	二六
林紓	三〇
易順鼎	三三
楊度	四二
蔣智由	四二
湯壽潛	四七
孫文	四八
宋教仁	四八
黃興	四八
汪兆銘	四九
章炳麟	五一

陳蛻	五一
居正	五六
于右任	五六
景耀月	五七
呂志伊	五八
陳三立	五八
樊增祥	六六
陳衍	八二
俞明震	八四
朱祖謀	八五
陳詩	八五
潘飛聲	八六
狄葆賢	八九
楊增華	九一
羅惇齋	九二
李瑞清	九三

鄧實	九三
諸宗元	一〇〇
黃節	一〇三
劉三	一〇五
王鐘麒	一〇五
陳去病	一〇七
柳棄疾	一一三
高燮	一一九
高旭	一二二
龐樹柏	一二六
姚光	一三一
周實	一三一
鄒銓	一三三
方爾咸	一三五
孫雄	一三六
蔣維喬	一三六
蔣士超	一三七
金石	一四〇

梁鴻志	一四一
潘博	一四二
李振鐸	一四四
姚文棟	一四五
曾習經	一四六
汪榮寶	一四六
汪洵	一四七
李岳瑞	一四七
屠寄	一四七
李宣龔	一四八
麥孟華	一四八
甯調元	一四八
雷昭性	一四九
葉葉	一五〇
黃侃	一五〇
劉瑗	一五三
曾延年	一五三
陽兆鯤	一五四

楊銓	一五四
沈礪	一五四
吳梅	一五六
沈昌直	一五六
傅專	一五七
鄭澤	一六〇
龔爾位	一六〇
黃鈞	一六一
林之夏	一六一
林百舉	一六二
李息	一六二
俞鏐	一六二
余壽頤	一六三
蔡有守	一六三

姜胎石	一六三
張素	一六四
林學衡	一六五
姚錫鈞	一六六
周祥駿	一六七
李燮樞	一六七
曹昌麟	一六八
高士勳	一六八
王詠霓	一六八
王葆楨	一六九
陳樸	一六九
胡懷琛	一七〇
王國維	一七一

近代名人詩選

王闓運

戴祠館中夜起作

夜中不能寐。落月上屋楹。秋蟲知我興。繞舍似爭鳴。天機使之然。焉能闕其聲。鏘華向搖落。天地復肅清。羣動盡息響。沉爾瑣細情。達士惜窮居。觀時安所營。

湘上

客意已在水。遙舟送晴暉。殘雲藉落日。隔岸明我衣。平疇上餘青。暝色合衆微。煙態如悅人。藹藹還自歸。長夜渺所歎。涉江當爲誰。

清秋靜萬木。白露旣濡浹。戎葵怯霜花。伶俜伴寒蟬。愁心寄遙林。暮色藏荒堞。西風吹我夢。夢爲江上葉。漁鐙照隔浦。欲渡不可涉。流波有安瀾。吾將任行楫。

贈彭嘉玉

寒蟬翳東林。蟋蟀鳴西堂。微生有常棲。畸士獨無鄉。秋河泛桃楹。故里如他方。閉戶心幽憂。涼獨衆所忘。余念子孤居中。夜自旁皇。荒園秋草多。窮巷阻車行。譬彼倚蘭花。空谷有孤芳。豈不惜寥落。神全何所傷。

寄資欽亮

北風吹驚塵。朝夕無停飛。寒蟲東息音。歲御不我回。始悟同袍子。遠駕去莫追。嚴冬各有家。行者獨何歸。人生非

草木凋落意不肥。木落當復榮。日月逝以馳。裊裊陟高山。道遠與子違。感彼孤鴻征。霜雪更相摧。遺音若可尋。萬里慰孤礪。

擬客從遠方來

客從遠方來。遣我駕文綺。別時未云久。感君念如此。裁成見新故。藏之誰見美。發篋三峙嶠。使我中夜起。時俗妒真交。歎息我與你。

與龍鄧同遊衡山舟中作

晚風吹流波。奔波不可尋。連岡無斷蹤。重雲生遠心。佇瞻穹窿低。坐待夜氣陰。鳴鉦駐余棹。遠鐙搖澗林。喧聞衆籟雜。靜會江底深。仙情結游侶。秋思託長吟。山水但一氣。曠望空茫茫。亂蛩答岑寂。四野衆寒光。天風復橫過。濤聲夜浪浪。秋氣本寥亮。助之羣動鳴。坐中寂無言。滿舫生孤涼。縱浪大化中。塵想斯可忘。

從南岳祠登吸雲嶺

天根蟠軫虛。坤紀壯炎服。鴻濛融朱光。高深闕神屋。雲觀在冥杳。下視但蒼綠。渾淪自太古。厓巒盡奔伏。風危人益高。日夕氣相逐。儻爲蘇門嘯。恐驚龍湫谷。

登南天門宿上封寺

清肅闕幽厓。噴薄漱泉根。沈沈積石寒。曖曖殘陽昏。下方涼雨頽。上界晴雲奔。高天覆圓蓋。黛色盡煙痕。飛鳥隨我前。相與叩石門。置身六合外。息影南斗垣。

古別離

宋家東鄰女。顏色如陽春。當時一顧本無意。誤爾三年下蔡人。東牆蝴蝶西牆花。陰陰牆外如天涯。春風一日不相待。碧窗咫尺烟如紗。當窗屈戌無時開。昔日晨妝金雀釵。金釵墮絕不知處。網絲不斷年年灰。撥灰畫字言有情。字滅灰飛情暗生。灰亦有時滅。想思之字何由明。

春日

春日照春衣。春心不自知。如何中有怨。猶言無所思。所思信無端。含情非爲人。偶然攜影坐。已是歷朝昏。

倡樓怨節

簾邊春風易入。庭外草光若浮。搖情吹影未已。入眼存心自愁。鳥聲各言有怨。江波到頭不歸。經冬歷春復盡。何爲辛苦羅衣。

擬美人梳頭歌

曉簾花蕊燕支氣。紅雲冉冉春人起。散髮垂領已堪憐。不待妝成知絕世。鏡冰迎面春寒輕。青絲縷縷手雙縈。自疑照影雙神女。自看對坐兩傾城。捉梳整髻不嫌遲。挑朱點黛亦多時。著意回身窺側髻。壓花回手插橫筓。璇窗早月初相映。亭亭顧步量相稱。削玉垂肩背後勻。銜珠綴耳釵邊瑩。妾家雙影不曾單。長向妝臺笑舞鸞。薄妝隨意非言好。卻勝圖成祇自看。

河哇澣衣歌

荆釵綠鬟貧家女。浣衣向曉臨江渚。江水沈沈動遠波。素環斜領相看語。自言二十初嫁年。夫婿從軍昨戍邊。新婚離別那可說。夕峯遠近從人傳。攬妾嫁時衣。時淺衣尙新。牽君別時袖。袖綻恐難紉。江聲破碎衣聲軟。人道洗多紅色淺。已拚衰老顏色故。何須更惜青黃轉。思君不見淚沾襟。襟上愁痕入水深。江水長流待君飲。君知妾淚在君

心。

代薄命

妾命爲君薄。愁多未可輕。明春伴楊柳。仍是去年情。理鬢看又滿。遙心坐自驚。半衾甘獨熱。孤月苦相明。不爲封侯去。從來愛遠行。

雄劍篇贈李伯元

雄劍不希世。光氣騰紫霄。登城敵頭白。揮手明星搖。千秋神怪有離合。滿堂華燭風颯颯。此時起舞翻離騰。六月寒雲天欲雪。彈鋏辭君歸故山。白波九道流潺潺。請君直斬長鯨背。洗劍秋河明月寒。

鄱陽蓮塘夜泊

湖陰足水漲。百里滯旬日。風來陂陀靜。夜久垵岸出。遠近清星采。漣淪分月色。柴荆涼洗洗。梁稻宵密密。旅人獨勞望。漁艇不我卽。

袁口

南水流向章。清江夜潮白。秋岸佇涼襟。驚塵暫一息。川原有餘秀。星月清遠色。官城罷宵柝。漁火沈寒碧。估客且同舟。鎮戍誰荷戟。

多難

歲月多猶難。干戈罷遠遊。還持兩行淚。遙爲故人愁。薄膠侵殘夜。西風似舊秋。江湖空浩蕩。無路覓前游。

長別離

襄陽游使兒。馳逐東風前。垂轡大堤上。春草生兩邊。左挽綠沈弓。右控鶴血弦。依依雲中雁。摧毛墮連翩。銜我家中書。書來竟何年。見此忽憶歸。不忍射汝單。漢北非朔漠。中道遭傷殘。遠行多苦辛。笑謝諸少年。

折楊柳

東城門外柳。最與別相宜。明知心慊慊。故作影依依。君子自茲遠。春風不共吹。歸來白日晚。素手理羅衣。但得長相送。殷勤未敢辭。

至湘岸送峰臣

微路望青山。蒼蒼秋已夕。危世不傷離。各還棲枳棘。饑鴻羨稻粱。罽羅阻南北。欲與辨窮通。空江暮光隔。

莫雨

莫雨疎疎過。清鐘了了聞。影驚槐葉去。涼趁竹枝分。獨坐徒多感。哀時且論文。愁心兼靜意。來往覺紛紛。

晴川閣

重閣明秋色。飛梯壓漢皋。手招黃鶴去。身與片雲高。亂後山魈窟。霜前古木號。朱闌舊憑處。祇是長蓬蒿。

月夜

缺月生殘夜。天涯自覺寒。繡簾深不卷。玉鏡豈同看。影破愁仍滿。衾虛夢總難。多情宜小病。閒睡憶前歡。西望長沙水。從天向此來。月光寒不落。霜氣坐相摧。大野風難定。高樓笛易哀。亂離無驛使。辛苦折江梅。

關山月

胡天九月行人絕。胡笳半夜悲風發。孤城高高月滿樓。大漠昏昏沙似雪。清輝苦冷露零薄。哀哀鴻雁怨關山。營

邊漢卒擁衾聽帳下吳姬掩淚彈。五陵少年慣歌舞。自見月明無此苦。明朝取印還嫖姚。免作年年別鄉土。

擬鮑明遠行路難

金尊白玉盤。請君罷酒歌。路難欲令四坐分此苦。涕緣纓下摧心肝。孟嘗昔聞雍門曲。眼前華屋生荆菅。丈夫意氣不可料。安能獨愁復孤歎。

班姬昔日承恩時。長門金屋百不知。年年月月少顏色。遙遙夜夜悲別離。室中瑤琴見之歎。玉柱金徽滿懷怨。共知恩重良易絕。翻恨弦輕不能斷。憶昔卷衣來玉牀。何言旦夕變炎涼。昭陽新人夜念此。危心息意倚君王。君不見孤楊樹上孤棲燕。失侶啁啾悲鳴咽。君不見昔時朱戶文綺綰。古時歌吟今丘虛。豪華反覆一俄頃。況我離別海上居。經年雙飛誤還此。少年挾彈腰鹿盧。珠丸一出不可返。單雄碎翅沈泥塗。正憶去年珠箔裏。近人整翮徐且舒。華堂錦障苦爲累。主人去我庭階燕。荒田野宿得自恣。甯作長流水中鳧。

百尺桐生金井旁。玉作寒泉潤根底。鹿盧一轉一惆悵。使我憔悴西風裏。洛陽名工制作琴。徽以齊弦合宮徵。豈憶當年霜露時。同根苦樂之相倚。美人誤向井上彈。故根枯倒依井闌。升沈新故有如此。急弦哀響爲君歎。中庭桑樹枝葉葉復離離。別時與君手種此。此樹長成君未回。閨中獨宿夜獨織。采葉繅繭爲君衣。不願君身稱長短。願得衣到人已歸。忽聞鄰婦中夜泣。使妾方寸無所裁。

南山黃柏中作琴。燕人揄袖成輕音。主人但知此曲樂。安能明我中苦心。君不見柏梁銅臺高會日。交戟離宮人辟易。至今樵采上邱壠。斫樹作薪人不惜。從來貴賤如轉丸。眼前何用生波瀾。高張急調喻者少。請君南望北邙山。長安陌頭金貝鞍。健兒騎逐黃塵間。揚鞭一去萬餘里。少年不識行路難。避讎懷刃向遼海。歸來故里成新阡。吳姬白髮羞不出。涕零雨面思故歡。人生少壯不爲樂。安能踰躋凋朱顏。

東飛伯勞西飛燕。舊寵新歡不相見。昔我初入深宮時。何悟朱顏有衰變。傾心倚愛無所留。翠眉明璫獨相羨。黃

河千年猶一清。人事崎嶇不如願。初疑一旦成山河。安知積漸如霜霰。匣中明鏡繡作衣。照我憔悴爲我悲。不惜與君共棄置。貴欲知人年少時。

春游曲

青袍驄馬雙行日。春氣隨人無數尺。近山遠山連水明。深林淺林間花碧。道旁女兒坐青春。紅靨勻脂愁著人。垂楊別出青門路。一道相思持贈君。

紫苑洲坐月

月明山始煙。露下江已秋。潭波影深樹。參差共悠悠。夜岸隔人語。清歌答流溪。微燈若流螢。隱見清夜幽。卽此在塵外。何時從釣舟。

擬傷離新體

行行重行行。持鞭望關城。昨向高樓宿。今同蕩子征。本自多別離。歷亂遣人思。春花正迎轡。春水復漸帷。晨風歇香袂。胡笳送酒卮。南轍傷并騎。北枕驚越枝。前瞻山色盡。後屬路塵飛。杏梁此時明月多。梁間月下斂雙娥。的的琴弦怨。深深子夜歌。昔耶沒履跡。熠燿代銅荷。詎可傳經聞歲月。但言須復早時過。啼鳥到頭識更漏。庭前垂楊不如舊。舊日楊柳舊庭前。還勞心憶共心憐。悵望臨江旁。落景多流光。家中蠶繭已能老。邊地條桑今許長。鬱金堂前留燕子。朱鳥窗間傳鳳皇。臨江不能渡。關山問來處。無信寄尺書。聞秋擣紈素。流轉易成匹。團扇終如故。當君下機時。知我迴勝路。

怨詩

明月皎疏寮。徘徊照君心。空帷情虛無。蘭室常獨陰。初爲五日期。三秋尙孤衾。晨妝對芳池。涼藻帶華潯。鮮翠依

彫櫳嘉鮪佇清琴。願因梁塵起。飛怨繞君襟。回風復吹楫。誰能聽餘音。

■ 避地明岡詠涓水旁諸山

疊巘含隱秀。高人良在茲。陂道玩曲折。歸雲共逶迤。夕陰楓葉明。曉露蘆雁低。寒來慙餘芳。節往悲新離。折瓊眷孤遊。停策澹所思。杉柏合圓洲。清流泛無緇。入山何必深。寄興屬此時。

■ 寄懷辛眉

空山霜氣深。落月千里陰。之子未高臥。相思共此心。一夜梧桐老。聞君江上琴。

■ 梅花

寂寂江梅樹。手垂歲暮時。雪深除夢到。香遠隔烟知。花落飲微醉。月明空所思。寒山徑千里。春思託將離。

■ 待曉將別

淺別愁消酒。深寒夜入衣。壁燈青向盡。曉樹綠如歸。歷歷春相見。遙遙夢恐稀。向門楊柳在。勞爾送征騅。

■ 當爐曲

當爐女兒坐春陽。欲言不言淚霑裳。春風吹腰學楊柳。盈盈十五嬌君旁。桃花在筵月將落。始奏別瑟傳金觴。金觴未盡江潮生。妾歌未半君當行。君行急。歌轉遲。垂素手。低蛾眉。蛾眉低。意不揚。驄馬一時去。三日餘音空繞梁。

■ 今別離

別來五日春水生。桃枝成碧花欲明。開簾望東風。遠近傷我情。君腸斷。妾心老。繡衣羅裳著春早。愁如細雨連煙草。去年離別鶯始啼。今年啼鶯別處飛。垂楊復何心。從風飄絮來。天涯浮雲皎月意。不盡絕思還空帷。

送人歸武昌

寂寂思江漢。尊前罷楚歌。故家喬木盡。孤棹夕陽多。旅夢愁先到。春風不重過。月湖隄上柳。啼眼奈愁何。

又送

久客終無藉。今歸亦自迷。亂山疲馬去。春雨一鳩啼。舊恨空江水。餘生視柳梯。不知鄉國路。祇是聽征鼙。

春思寄婦

門外青青草。雲低一半陰。不知春已暮。惟向雨中深。遠道勞相憶。高樓見此心。分明碧潭外。微路可重尋。近來離別慣。歸夢不能多。每聽流鶯語。知君斂翠蛾。春生楊柳外。江隔洞庭波。思與落花去。浮沈可奈何。

楊白花

門前楊柳枝。相望湘江水。辛苦弄舟人。夜夜煙波裏。楊花晝冥冥。妾醉君獨醒。東風吹花作微雪。此時攪夢難分明。今朝燕子不銜去。明日浮萍滿洞庭。

雜詩

遲月半宵窗。娟娟夢初醒。佳人處蘭室。滅燭思離情。幽戶無外響。微風有餘聲。屣履安所之。虛心對空庭。淚爲玉枕茲。恨與瓊樹零。徒聞曉來雁。肅肅且孤征。

灼灼宛童花。弱蒂搖春姿。自非青松節。焉得陵秋時。常恐鷓鴣鳴。不復同蘭芝。聞君念我寒。日暮自修持。歲晚安足論。但恐軒車遲。君子恩未及。涼風厲餘威。既來攬空條。歎息亦何施。豈曰無蕭艾。非君之所期。風吹彭蠡波。日落潯陽臺。鼓吹無遺音。壯士悵徘徊。張公兩龍劍。神物已復薶。落葉千里心。蕭蕭向西來。念我同

袍人孤心恨如灰。誰能歌國殤。郢路有時開。

黃鵠無六翮。下與燕雀儔。嗷嗷九皋中。意不如周周。思欲一彷徨。靈曜忽西流。一朝布衣人。撫劍觀九州。借問當路子。全國在克謀。盤石失泰山。未若登蟻丘。今君守尉羅。藪澤欲何求。

燕巢高堂中。所託誠亦微。啁啾藻井旁。常恐彫楹摧。榮華有衰謝。但恐時命乖。蕭條柏梁宮。倉卒建章臺。嫠婦恤周室。誰云非我哀。

出門望千里。千里安可知。豈爲目中見。曠蕩良有之。寸心若懷陰。冥色相委蛇。浮雲尙異鄉。焉得通我辭。誰謂川無梁。舟楫昧所施。本無佳人約。徙倚自生疑。森風激高輪。疲馬莫思歸。彼土非吾習。途窮當見欺。

夜半送客

宵駕尋野煙。前山暗深樹。隔岸聞犬聲。知君渡江去。秋夜螢火稀。孤光引歸路。

出門

出門徒佇立。望遠欲悲歌。落日客愁盡。清秋詩思多。疏鐘送歸鳥。微雨徧殘荷。因問忘機者。閒居意若何。

還舟泊易灣

新月上平蕪。青青似有無。草痕徧過馬。燈網夜分樹。獨樹人家靜。深山夕望孤。故鄉如客裏。閒步獨峙嶺。

從南昌至臨川一望平林沙田作一首

寒原送雲日。空秀無遠近。渺然恬澹意。浩浩滄洲影。輕煙有餘妍。夕照見低隱。遙瞻山漸微。迴觀勢難盡。平林多貞姿。蔥翠自相引。既得汀渚趣。庶覺塵勞泯。緇髻何足矜。忘年託松菌。

夜半渡浙

雪渚雁鳴風。夜江雞唱寒。寂聽動哀響。寥亮滿江山。羈情苦飛越。憑虛忽超遷。餘清媚菰蒲。素碧隱霜漣。曉色物
曖曖。莫歲思縣縣。本知虛舟達。誰云舍筏賢。

除夕登吳山觀杭州城

伏生眺武昌。庾信哀金陵。王氣一朝盡。山川不再興。茲邦信富饒。夸情坐相仍。窈窕呈市肆。綺紈追上陵。冶遊亮
成俗。靈境共攀登。漠漠俯廣達。輝輝麗彫臺。鐘漏競曉歸。簫管并風升。賢達旣彌代。土風不可勝。聲明實蔥蒨。佳麗
見嗟稱。誰謂蓬生曲。化俗在賢能。如何視推遷。衰盛竟無憑。武功驚遐邇。成敗互相乘。雄圖獨安寄。太康有遺懲。慘
澹寄客懷。憑高意飛騰。心憂思何其。歲晚歎無朋。

月夜渡江

自從錢塘來。久絕浩渺觀。今爲揚子渡。曠若溟渤寬。挂帆便輕風。鼓柁陵遠天。蒼茫煙波際。仰見孤月圓。迴望已
悲壯。安用憑波瀾。空明千餘里。始覺天地寒。靈境不可居。靜夜想無端。太息濯塵纓。歸與殊未閒。

入西山從潭柘寺東澗至山亭

幽柏澗半青。芳草徑初碧。參差重閣外。峭蒨山四壁。入門松風起。偶坐溪亭夕。靈泉度烟響。歸人共鴉息。暫聞清
梵落。始覺心去寂。暝色春濛濛。孤此雲外石。

瀟碧房聽階上流泉

瀟碧延清銜。掩映三竹林。坐對白雲莫。安知溪水心。微風又如何。歷歷一鐘音。春心夜始寒。想象空山深。幽夢斷
復續。吾其觀古今。

月夜汎漢